

摘藻堂四庫全書薈要

史部

欽定四庫全書薈要

史部  
元史卷一至四



詳校官主事銜<sub>臣</sub>徐以坤

欽定四庫全書蒼要卷六千三百八十 史部

元史卷一

明翰林學士亞中大夫知制誥兼修國史宋濂等修

本紀第一

太祖

太祖法天啓運聖武皇帝諱特穆津姓却特氏蒙古部人也其十世祖勃端察爾母曰阿倫果斡嫁托本默爾根生二子長曰布固哈塔吉次曰博克多薩勒濟固既

而夫亡阿倫果幹寡居夜寢夢白光自天窻入化為金色神來趨卧榻阿倫果幹驚覺遂有娠產一子即勃端察爾狀貌竒異沉默寡言家人謂之癡獨阿倫果幹語人曰此兒非癡後世子孫必有大貴者阿倫果幹歿諸兄分家貲不及之勃端察爾曰貧賤富貴命也貲財何足道獨乘青白馬至巴爾圖敖拉之地居焉食飲無所得適有蒼鷹搏野獸而食勃端察爾以緡設機取之鷹即馴狎乃臂鷹獵兔禽以為膳或闕即繼似有天相之

居數月有民數十家自騰格哩呼喇之野逐水草來遷  
勃端察爾結茅與之居出入相資自此生理稍足一日  
仲兄忽思之曰勃端察爾獨出而無齋近者得無凍餒  
乎即自來訪邀與俱歸勃端察爾中路謂其兄曰騰格  
哩呼喇之民無所屬附若臨之以兵可服也兄以為然  
至家即選壯士令勃端察爾帥之前行果盡降之及勃  
端察爾歿子巴噶哩台哈必齊嗣生子曰瑪哈多丹瑪  
哈多丹之妻曰摩納倫生七子而寡摩納倫性素剛急

時雅賚爾部有羣小兒掘田間草根以為食摩納倫乘車出適見之怒曰此田乃我子馳馬之所羣兒輒敢壞之邪驅車徑出輾傷諸兒有至死者雅賚爾因忿怒盡驅摩納倫馬羣以去摩納倫諸子聞之不及被甲往追之摩納倫私憂曰吾兒不甲以往恐不能勝敵令子婦載甲赴之已無及矣既而果為所敗六子皆死雅賚爾遂乘勝殺摩納倫滅其家唯一長孫海都尚幼乳母匿諸積木中得免先是摩納倫第七子納沁於巴喇呼民

家為贅壻故不及難聞其家被禍來視之見病嫗十數  
與海都尚在其計無所出幸驅馬時兄之黃馬三次掣  
套竿逸歸納沁至是得乘之乃偽為牧馬者狀詣雅賚  
爾路逢父子二騎先後行臂鷹而獵納沁識其鷹曰此  
吾兄所擊者也趨前給其少者曰有赤馬引羣馬而東  
汝見之乎曰否少者乃問曰爾所經過有鳧鴈乎曰有  
曰汝可為吾前導乎曰可遂同行轉一河隈度後騎相  
去稍遠刺殺之繫馬與鷹趨迎後騎給之如初後騎問

曰前射鳧鴈者吾子也何為久卧不起耶納沁以鼻衄對騎者方怒納沁乘隙刺殺之復前行至一山下有馬數百牧者唯童子數人方擊髀石為戲納沁熟視之亦兄家物也給問童子亦如之於是登山四顧悄無來人盡殺童子驅馬臂鷹而還取海都并病嫗歸巴喇呼之地止馬海都稍長納沁率巴喇呼齊格諸民共立為君海都既立帥兵往攻雅賚爾臣屬之形勢寢大列營帳於巴喇噶罕河上跨河為梁以便往來由是四傍部族



歸之者漸衆海都歿子拜星呼爾嗣拜星呼爾歿子敦  
巴該嗣敦巴該歿子噶布勒汗嗣噶布勒汗歿子巴爾  
達木嗣巴爾達木歿子伊蘇克依嗣國勢愈盛大伊蘇  
克依崩至元三年十月追謚烈祖神元皇帝初烈祖征  
塔塔爾部獲其部長特穆津宣懿太后諤楞適生帝手  
握凝血如赤石烈祖異之因以所獲特穆津名之志武  
功也族人泰楚特部舊與烈祖相善後因塔爾巴哈台  
用事遂有隙絕不與通及烈祖崩帝方幼冲部衆多歸

秦楚特近侍托多呼爾察者亦將叛帝泣留之托多呼  
爾察曰深池已乾矣堅石已碎矣留復何為竟帥衆去  
宣懿太后怒其弱已也麾旗將兵躬自追叛者驅其太  
半而還時帝麾下綽奇別居薩里河扎木哈克部人托  
台奇爾居伊魯格勒泉時相侵凌掠薩里河牧馬以去  
綽奇麾左右匿羣馬中射殺之扎木哈克以為怨與秦  
楚特諸部合謀以衆三萬來戰帝時駐軍都爾本兆蘇  
之野聞變大集諸部兵分十有三翼以俟扎木哈克至

帝與大戰破走之當是時諸部之中唯秦楚特地廣民衆號為最強其族昭壘部與帝所居相近帝常出獵偶與昭壘獵騎相屬帝謂之曰今夕可同宿乎昭壘曰同宿固所願但從者四百因糗糧不具已遣半還矣今將奈何帝固邀與宿凡其留者悉飲食之明日再合圍帝使左右驅獸向昭壘昭壘得多獲以歸其衆感之私相語曰秦楚特與我雖兄弟常攘我車馬奪我飲食無人君之度有人君之度者其惟特穆津太子乎昭壘之長

裕勒時為泰楚特所虐不能堪遂與塔海達魯領所部  
來歸將殺泰楚特以自效帝曰我方熟寐幸汝覺我自  
今車轍人跡之塗當盡奪以與汝矣已而二人不能踐  
其言復叛去塔海達魯至中路為泰楚特部人所殺昭  
壘部遂亡時帝功德日盛泰楚特諸部多苦其主非法  
見帝寬仁時賜人以裘馬心悅之若齊拉袞若哲伯若  
錫呼噶額布根諸人若多隆吉斯若扎拉爾莽果諸部  
皆慕義來降帝會諸族色辰岱酬及色辰伯奇等各以

旄車載湏酪宴于鄂諾河上帝與諸族及色辰伯奇母  
呼爾察之前共置馬湏一革囊色辰伯奇次母伊伯格  
勒前獨真一革囊呼爾察怒曰今不尊我而貴伊伯格  
勒乎疑帝之主饒者實奇爾所為笞之遂有隙時皇弟  
伯勒格台掌帝克呼蘇嚕克事  
克呼蘇嚕克華  
言野外牧場也布琳掌  
色辰伯奇克呼蘇嚕克事布琳從者因盜馬勒伯勒格  
台執之布琳怒斫伯勒格台傷其背左右欲鬪伯勒格  
台止之曰汝等欲即復讐乎我傷幸未甚姑待之不聽

各持馬乳橦疾鬪奪呼爾察和里察二哈屯以歸色辰伯奇遣使請和因令二哈屯還會塔塔爾部長摩古津掃哩圖背金約金主遣丞相完顏襄帥兵逐之北走帝聞之發近兵自鄂諾河迎擊仍諭色辰伯奇帥部人來助候六日不至帝自與戰殺摩古津掃哩圖盡虜其輜重帝之麾下有為奈曼部人所掠者帝欲討之復遣六十人徵兵於色辰伯奇色辰伯奇以舊怨之故殺其十人去五十人衣而歸之帝怒曰色辰伯奇曩答我實奇

爾斫傷我伯勒格台今又敢乘敵勢以陵我耶因帥兵  
踰沙磧攻之殺虜其部衆唯色辰岱酬僅以妻孥免越  
數月帝復伐色辰岱酬追至圖烈圖之隘滅之克呼部  
扎實甘布來歸扎實甘布者部長王汗之弟也王汗名  
托里受金封爵為王番言音重故稱王為王汗初王汗  
之父呼爾察和斯必瑠既卒王汗嗣位多殺戮昆弟其  
叔父珠爾帥兵與王汗戰逼於哈拉衮隘敗之僅以百  
餘騎脫走來奔于烈祖烈祖親為將兵逐珠爾走西夏

復奪部衆歸于王汗王汗德之遂相與為盟稱為諳達  
烈祖崩王汗之弟額爾克哈喇怨王汗多殺之故復叛  
歸奈曼部奈曼部長伊納克齊為發兵伐王汗盡奪其  
部衆與之王汗走河西回鶻回回三國奔契丹既而復  
叛歸中道糧絕將羊乳為飲刺索馳血為食困乏之甚  
帝以其與烈祖交好遣近侍往招之帝親迎撫勞安置  
軍中振給之遂會于圖喇河上尊王汗為父未幾帝伐  
默爾奇斯部與其部長托克托戰于瑪尼齊山掠其貲



財田禾以遺王汗王汗因此部衆稍集居亡何王汗自以其勢足以有為不告於帝獨率兵攻默爾竒斯部人敗走托克托奔博囉呼察隘王汗大掠而還於帝一無所遺帝不以屑意會奈曼部長博囉汗不服帝復與王汗征之至克實克巴克實之野遇其前鋒額特圖博囉領百騎來戰見軍勢漸逼走據高山其馬鞍轉墜擒之曾未幾何帝復與奈曼部驍將齊蘇實巴爾二人遇會日暮各還營壘約明日戰是夜王汗多燃火營中示

人不疑潛移部衆於別所及旦帝始知之因頗疑其有異志退師薩里河既而王汗亦還至圖喇河王汗子伊勒哈及其叔扎實甘布來會齊蘇等察知之乘其不備襲虜其部衆于道伊勒哈奔告王汗王汗命伊勒哈與布爾古特共追之且遣使來曰奈曼不道掠我人民太子有四良將能假我以雪恥乎帝頓釋前憾遂遣保爾濟穆呼哩博囉罕齊拉袞四人帥師以往師未至伊勒哈已追及齊蘇與之戰大敗布爾古特已成擒流矢中

伊勒哈馬勝幾為所獲須臾四將至擊奈曼走盡奪所掠歸王汗已而與皇弟哈扎爾再伐奈曼拒鬪於和倫扎色山大敗之盡殺其諸將族衆積屍以為京觀奈曼之勢遂弱時泰楚特猶強帝會王汗於薩里河與泰楚特部長杭呼等大戰鄂諾河上敗走之斬獲無算哈塔錦部薩勒珠特部都爾本部塔塔爾部鴻吉哩部聞奈曼泰楚特皆敗咸不自安會於阿嚕泉斬白馬為誓欲襲帝及王汗鴻吉哩部長岱音恐事不成潛遣人告變

帝乃與王汗自呼圖澤逆戰於拜里川又大敗之王汗遂分兵自伊拉哩河而行扎實甘布謀於阿敦愛實伊克托爾等曰我兄性行不常既屠絕我昆弟我輩又豈得獨全乎阿敦愛實泄其言王汗令執伊克托爾等至帳下解其縛且謂伊克托爾曰吾輩由西夏而來道路饑困其相誓之語遽忘之乎因唾其面坐上之人皆起而唾之王汗又屢責扎實甘布至於不能堪扎實甘布與伊克托爾等俱奔奈曼帝駐軍於察察爾山起兵伐

塔塔爾部部長敖拉溫都爾等來逆戰大敗之時鴻吉  
哩欲來附哈扎爾不知其意往掠之於是鴻吉哩歸扎  
木哈克部與都爾本伊奇拉斯哈塔錦果囉羅塔塔爾  
薩勒珠特諸部會於犍河共立扎木哈克為楚勒罕盟  
于圖拉必喇河岸誓曰凡我同盟有洩此謀者如岸之  
摧如林之伐誓畢共舉足蹋岸揮刀斫林驅士卒來侵  
塔海罕時在衆中與帝麾下超爾結為昏姻超爾偶往  
視之具知其謀即還至帝所悉以其謀告之帝即起兵

逆戰於哈里雅爾台和囉噶之地破之扎木哈克走鴻  
吉哩部來降歲壬戌帝發兵於烏爾呼薩勒扎河伐昂  
齊塔塔爾察罕塔塔爾二部先誓師曰苟破敵遂北見  
棄遺物慎無獲俟軍事畢散之及勝族人阿勒坦呼濟  
爾達哩台三人背約帝怒盡奪其所獲分之軍中初托  
克托敗走博囉呼察隘既而復出為患帝帥兵討走之  
至是又會奈曼部博囉汗約都爾本塔塔爾哈塔錦薩  
勒珠特諸部來侵帝遣騎乘高四望知奈曼兵漸至帝

與王汗移軍入塞伊勒哈自北邊來據高山結營奈曼軍衝之不動遂還伊勒哈尋亦入塞將戰帝遷輜重於他所與王汗伊阿蘭塞為壁大戰于吹丹之野奈曼使神巫祭風雪將欲因其勢進攻既而反風逆擊其陣奈曼軍不能戰欲引還雪滿溝澗帝勒兵乘之奈曼大敗是時扎木哈克起兵援奈曼見其敗即還道經諸部之立已者大縱掠而去帝欲為長子卓沁求昏於王汗女超爾必濟王汗之子托斯和亦欲尚帝女噶沁必濟俱

不諧自是頗有違言初帝與王汗合軍攻奈曼約明日戰扎木哈克言於王汗曰我與君是白鴿雀他人是鴻鴈耳白翎雀寒暑常在北方鴻鴈遇寒則南飛就暖耳意謂帝心不可保也王汗聞之疑遂移部衆於別所及議昏不成扎木哈克乘隙謂伊勒哈曰太子雖言是王汗之子嘗通信於奈曼將不利於君父子君能加兵我當從傍助君也伊勒哈信之會達哩台呼濟爾阿勒坦等叛歸伊勒哈亦說之曰我等願佐君討宣懿太后諸



子也伊勒哈大喜遣使告王汗王汗曰扎木哈克巧言寡信人也不足聽伊勒哈力言之使者往返者數四王汗曰吾身之存實太子是賴髭鬚已白遺骸冀得安寢汝乃喋喋不已耶汝善自為之母貽吾憂也扎木哈克遂縱火焚帝牧地而去歲癸亥王汗父子謀欲害帝乃遣使者來曰向者所議媯事今當相從請米飲布琿察爾

布琿察爾華言許親酒也

帝以為然率十騎赴之至中道心有所

疑命一騎往謝帝遂還王汗謀既不成議舉兵來侵圍

人齊里克齊聞其事密與弟巴達告帝帝即馳軍阿蘭

塞悉移輜重於他所遣哲哩木為前鋒俟王汗至即整

兵出戰先與珠勒根部遇次與董阿部遇又次與浩爾

實埒們部遇皆敗之最後與王汗親兵遇又敗之伊勒

哈見勢急突來衝陣射之中頰即斂兵而退於是奇味

部人棄王汗來降王汗既敗而歸帝亦將兵還至棟格

澤駐軍遣阿里哈致責於王汗曰君為叔父珠爾所逐

困迫來歸我父即攻珠爾敗之於河西其土地人民盡

收與君此大有功於君一也君為奈曼所攻西奔日沒處君弟扎實甘布在金境我遣人召還比至又為默爾奇斯部人所逼我請我兄色辰伯奇及我弟岱酬往殺之此大有功於君二也君困迫來歸時我過哈達拉歷掠諸部羊馬貲財盡以奉君不半月間令君饑者飽瘠者肥此大有功於君三也君不告我往掠默爾奇斯大獲而還未嘗以毫髮分我我不以為意及君為奈曼所傾覆我遣四將奪還爾民人重立爾國家此大有功於

君四也我征都爾本塔塔爾哈塔錦薩勒珠特鴻吉哩  
五部如海東禽之於鵝鴈見無不獲獲則必致於君此  
大有功於君五也是五者皆有明驗君不報我則已今  
乃易恩為讐而遽加兵於我哉王汗聞之語伊勒哈曰  
我向者之言何如吾兒宜識之伊勒哈曰事勢至今日  
必不可已惟有竭力戰鬥我勝則并彼彼勝則并我耳  
多言何為時帝諸族阿勒坦呼濟爾在王汗左右帝因  
遣阿里哈誚責王汗就令告之曰昔者吾國無主以色

辰岱酬二人實我伯祖巴勒噶特之裔欲立之二人固  
辭乃以汝呼濟爾為伯父訥袞之子又欲立之汝又固  
辭然事不可中輟復以汝阿勒坦為我祖呼都拉之子  
又欲立之汝又固辭於是汝等推戴吾為之主初豈我  
之本心哉不自意相迫至於如此也三河祖宗肇基之  
地母為他人所有汝善事王汗王汗性無常遇我尚如  
此况汝輩乎我今去矣我今去矣阿勒坦等無一言帝  
既遣使於王汗遂進兵虜鴻吉哩別部尼勒堅行至班

朱爾河水方渾帝飲之以誓衆有伊奇喇斯部人布圖者為果囉羅部所敗因遇帝與之同盟哈扎爾別居哈拉衮山妻子為王汗所虜挾幼子托歡走糧絕探鳥卵為食來會于河上時王汗形勢盛強帝微弱勝敗未可知衆頗危懼凡與飲河水者謂之飲渾水言其曾同艱難也王汗兵至帝與戰于哈喇克沁沙圖之地王汗大敗阿勒坦呼濟爾扎木哈克等謀弒王汗弗克奔奈曼達哩台巴林等部稽顙來降帝移軍鄂諾河源謀攻王

汗復遣二使往王汗偽為哈扎爾之言曰我兄太子今既不知所在我之妻孥又在王所縱我欲往將安所之耶王儻棄我前愆念我舊好即束手來歸矣王汗信之因遣人隨二使來以皮囊盛血與之盟及至即以二使為向導令軍士銜枚夜趨徹辰圖山出其不意襲攻王汗敗之盡降克呼部衆王汗與伊勒哈挺身遁去王汗嘆曰我為吾兒所誤今日之禍悔將何及王汗出走路逢奈曼部將遂為其所殺伊勒哈走西夏日剽掠以自

資既而亦為西夏所攻走至龜茲國龜茲國主以兵討殺之帝既滅王汗大獵於特默格川宣布號令振凱而還時奈曼部長廸延汗心忌帝能遣使謀於巴達勒達部主阿嚕哈斯曰聞東方有稱帝者天無二日民豈有二王耶君能益吾右翼吾將奪其弧矢也阿嚕哈斯即以是謀報帝居無何舉部來歸歲甲子帝大會於特默格川議伐奈曼羣臣以方春馬瘦宜俟秋高為言皇弟鄂齊錦曰事所當為斷之在早何可以馬瘦為辭伯勒



格台亦曰奈曼欲奪我弧矢是小我也我輩義當同死  
彼恃其國大而言誇苟乘其不備而攻之功當可成也  
帝悅曰以此衆戰何憂不勝遂進兵伐奈曼駐兵於沁  
達罕山先遣呼必哩哲伯二人為前鋒迪延汗至自阿  
勒台營於杭愛山與默爾奇斯部長托克托克呼部長  
阿林台寶衛喇特部長呼圖克伯奇暨都爾本塔塔爾  
哈塔錦薩勒珠特諸部合兵勢頗盛時我軍羸馬有驚  
入奈曼營者迪延汗見之語衆曰蒙古馬瘦弱如此當

誘其深入然後戰而擒之其將呼圖蘇伯奇對曰先王  
戰伐勇進不回馬尾人背不使敵人見之今為此遷延  
之計得非心中有所懼乎苟懼之何不令后妃來統軍  
也迪延汗怒即躍馬索戰帝以哈扎爾主中軍時扎木  
哈克從迪延汗來見我軍整肅謂左右曰奈曼初舉兵  
視蒙古軍若韃韃羔兒意謂蹄皮亦不留今吾觀其氣  
勢殆非往時矣遂引所部兵遁去是日帝與奈曼軍大  
戰至晡禽殺迪延汗諸部軍一時皆潰夜走絕險墜崖

死者不可勝計明日餘衆悉降於是都爾本塔塔爾哈  
塔錦薩勒珠特四部亦降已而復征默爾奇斯其長托  
克托奔迪延汗之兄博囉汗其屬岱爾諤遜獻女迎降  
俄復叛去帝至台哈寨遣博爾歡錫伯二人領右軍往  
平之歲乙丑帝征西夏拔拉伊哩寨經羅索城大掠人  
民及其橐駝而還

元年丙寅帝大會諸王羣臣建九旒白旗即皇帝位於  
鄂諾河之源諸王羣臣共上尊號曰青吉斯皇帝是歲

實金泰和之六年也帝既即位遂發兵復征奈曼時博  
囉汗獵於烏爾圖山禽之以歸迪延汗子庫楚類汗與  
托克托奔雅爾達實河上帝始議伐金初金殺帝宗親  
罕布海汗帝欲復讐會金降俘等具言金主璟肆行暴  
虐帝乃定議致討然未敢輕動也

二年丁卯秋再征西夏剋衛喇喀城是歲遣阿勒坦保  
喇二人使竒爾濟蘇既而伊德爾訥呼部阿勒達爾部  
皆通使來獻名鷹

三年戊辰春帝至自西夏夏避暑龍庭冬再征托克托  
及庫楚類汗時衛喇特部等遇我前鋒不戰而降因用  
為向导至雅爾達實河討默爾奇斯部滅之托克托中  
流矢死庫楚類汗奔契丹

四年己巳春輝和爾國來歸帝入河西夏主李安全遣  
其世子率師來戰敗之獲其副元帥高令公剋烏梁海  
城俘其太傅西壁氏進至克夷門復敗夏師獲其將威  
明令公薄中興府引河水灌之堤決水外潰遂撤圍還

遣太傅額特入中興招諭夏主夏主納女請和

五年庚午春金謀來伐築烏沙堡帝命哲伯襲殺其衆  
遂略地而東初帝貢歲幣于金金主使衛王允濟受貢  
於靜州帝見允濟不為禮允濟歸欲請兵攻之會金主  
璟殂允濟嗣位有詔至國傳言當拜受帝問金使曰新  
君為誰金使曰衛王也帝遽南面唾曰我謂中原皇帝  
是天上人做此等庸懦亦為之耶何以拜為即乘馬北  
去金使還言允濟益怒欲俟帝再入貢就進場害之帝

知之遂與金絕益嚴兵為備

六年辛未春帝居吉魯爾河西域哈喇婁部主阿爾斯  
蘭汗來降輝和爾國主伊都呼來覲二月帝自將兵南  
伐敗金將達實於野狐嶺取大水灤豐利等縣金復築  
烏沙堡秋七月哲伯攻拔烏沙堡及烏月營八月帝及  
金師戰于宣平之會河川敗之九月拔德興府居庸關  
守將遁去哲伯遂入關抵中都冬十月襲金羣牧監驅  
其馬而還耶律阿哈降入見帝于行在所皇子卓沁察

罕台諤格德依分徇雲內東勝武朔等州下之是冬駐蹕金之北境劉伯林瓜爾佳常格等來降

七年壬申春正月耶律瑠格聚衆于隆安自為都元帥遣使來附帝破昌桓撫等州金將赫舍哩糾堅等率兵三十萬來援帝與戰于權爾嘴大敗之秋圍西京金元帥左都監鄂通襄率師來援帝遣兵誘至密谷口逆擊之盡殪復攻西京帝中流矢遂撤圍九月察罕剋奉聖州冬十二月甲申哲伯攻東京不拔即引去夜馳還襲



克之

八年癸酉春耶律瑠格自立為遼王改元元統秋七月  
克宣德府遂攻德興皇子圖類駙馬齊竒先登拔之帝  
進至懷來及金行省完顏綱元帥高琪戰敗之追至古  
北口金兵保居庸詔克特卜齊守之遂趨涿鹿金西京  
留守呼沙呼遁帝出薶荆關敗金師于五回嶺拔涿易  
二州契丹烏蘭巴爾等獻北口哲伯遂取居庸與克特  
卜齊會八月金呼沙呼弑其主允濟迎豐王珣立之是

秋分兵三道命皇子卓沁察罕台諤格德依為右軍循

太行而南取保遂安肅安定邢洺磁相衛輝懷孟掠澤

潞遼沁平陽太原吉陽拔汾石嵐忻代武等州而還皇

弟哈扎爾及旺沁諾延卓齊特博恰為左軍遵海而東

取薊州平灤遼西諸郡而還帝與皇子圖類為中軍取

雄霸莫安河間滄景獻深祁蠡冀恩濮開滑博濟泰安

濟南濱棣益都淄濰登萊沂等郡復命穆呼哩攻密州

屠之史天倪蕭博特率衆來降穆呼哩承制竝以為萬

戶帝至中都三道兵還合屯大口是歲河北郡縣盡拔  
唯中都通順真定清沃大名東平德鄆海州十一城不  
下

九年甲戌春三月駐蹕中都北郊諸將請乘勝破燕帝  
不從乃遣使諭金主曰汝山東河北郡縣悉為我有汝  
所守惟燕京耳天既弱汝我復迫汝於險天其謂我何  
我今還軍汝不能搗師以弭我諸將之怒耶金主遂遣  
使求和奉衛紹王女岐國公主及金帛童男女五百馬

三千以獻仍遣其丞相完顏福興送帝出居庸夏五月  
金主遷汴以完顏福興及叅政穆延盡忠輔其太子守  
忠留守中都六月金紂軍卓多等殺主帥率衆來降詔  
薩木哈舒穆魯明安與卓多等圍中都帝避暑魚兒灤  
秋七月金太子守忠走汴冬十月穆呼哩征遼東高州  
盧琮金扑等降錦州張鯨殺其節度使自立為臨海王  
遣使來降

十年乙亥春正月金右副元帥富察齊錦以通州降以

齊錦為元帥二月穆呼哩攻北京金元帥烏庫哩音達  
琿以城降以音達琿為留守烏頁爾權兵馬都元帥鎮  
之興中府元帥石天應來降以天應為興中府尹三月  
金御史中丞李英等率師援中都戰于霸州敗之夏四  
月克清順二州詔張鯨總北京十提控兵從南征鯨謀  
叛伏誅鯨弟致遂據錦州僭號漢興皇帝改元興龍五  
月庚申金中都留守完顏福興仰藥死穆延盡忠棄城  
走明安入守之是月避暑桓州涼涇遣呼圖克等籍中

都帑藏秋七月紅羅山寨主杜秀降以秀為錦州節度使遣伊奇哩往諭金主以河北山東未下諸城來獻及去帝號為河南王當為罷兵不從詔史天倪南征授右副都元帥賜金虎符八月天倪取平州金經略使奇珠降穆呼哩遣史進道等攻廣寧府降之是秋取城邑凡八百六十有二冬十月金宣撫布希萬努據遼東僭稱天王國號大真改元天泰十一月耶律瑠格來朝以其子實沙入侍史天祥討興州擒其節度使趙守玉

十一年丙子春還臚胸河行宮張致臨興中府穆呼哩  
討平之秋錫里濟額特薩木哈巴圖爾率師由西夏趨  
關中遂越潼關獲金西安軍節度使尼瑪哈富勒呼拔  
汝州等郡抵汴京而還冬十月布希萬努降以其子特  
爾格入侍既而復叛僭稱東夏

十二年丁丑夏盜祁和尚據武平史天祥討平之遂擒  
金將巢元帥以獻察罕破金監軍瓜爾佳於霸州金求  
和乃還秋八月詔以穆呼哩為太師封國王將蒙古虜

漢諸軍南征拔遂城蠡州冬克大名府遂東定益都淄  
登萊濰密等州是歲圖們部民叛命布林都爾伯討平  
之

十三年戊寅秋八月兵出紫荆口獲金行元帥事張柔  
命還其舊職穆呼哩自西京入河東克太原平陽及忻  
代澤潞汾霍等州金將武仙攻滿城張柔擊敗之是年  
伐西夏圍其王城夏主李遵頊出走西涼契丹祿格據  
高麗江東城命浩沁扎拉率師平之高麗王暎遂降請



歲貢方物

十四年己卯春張柔敗武仙降祁陽曲陽中山等城夏  
六月西域殺使者帝親征遂取鄂托喇爾城擒其酋哈  
濟爾濟蘭圖秋穆呼哩克奇嵐吉隰等州進攻絳州拔  
其城屠之

十五年庚辰春三月帝克布哈城夏五月克塔什干城  
駐蹕頁實勒提斯河秋攻克鄂托羅爾城穆呼哩徇地  
至真定武仙出降以史天倪為河北西路兵馬都元帥

行府事仙副之東平嚴實籍彰德大名磁洺恩博滑濬  
等州戶三十萬來歸穆呼哩承制授實金紫光祿大夫  
行尚書省事冬金邢州節度使武貴降穆呼哩攻東平  
不克留嚴實守之撤圍趨洺州分兵徇河北諸郡是歲  
授董俊龍虎衛上將軍右副都元帥

十六年辛巳春帝攻布哈爾賽瑪爾堪等城皇子卓沁  
攻安集延巴爾昌等城並下之夏四月駐蹕鐵門關金  
主遣烏克遜仲端奉國書請和稱帝為兄不允金東平

行省事孟古棄城遁嚴實入守之宋遣苟夢玉來請和  
夏六月宋濂水忠義統轄石珪來降以珪為濟兗單三  
州總管秋帝攻巴喇勒哈等城皇子卓沁察罕台諤格  
德依攻玉隴哈什等城下之冬十月皇子圖類克瑪勒  
濟里克瑪勒齊阿喇斯等城穆呼哩出河西克葭綏德  
保安鄜坊丹等州進攻延安不下十一月宋京東安撫  
使張琳以京東諸郡來降以琳為滄景濱棣等州行都  
元帥是歲詔諭德順州

十七年壬午春皇子圖類克圖舍尼綽爾等城還軍經  
穆壘國大掠之遂渡楚楚拉河克伊拉等城乃與帝會  
合兵攻塔爾哈寨拔之穆呼哩軍克乾涇邠原等州攻  
鳳翔不下夏避暑塔爾哈寨西域主扎拉鼎出奔與瑪  
里克汗合呼圖克與戰不利帝自將擊之擒瑪里克汗  
扎拉鼎遁去遣巴拉追之不獲秋金復遣烏克遜仲端  
來請和見帝于回鶻國帝謂曰我向欲汝主授我河朔  
地令汝主為河南王彼此罷兵汝主不從今穆呼哩已

盡取之乃始來請耶仲端乞哀帝曰今汝遠來河朔既  
為我有關西數城未下者其割付我令汝主為河南王  
勿復違也仲端乃歸金平陽公胡天祚以青龍堡降冬  
十月金河中府來附以石天應為兵馬都元帥守之  
十八年癸未春三月太師國王穆呼哩薨夏避暑帕爾  
滿川皇子卓沁察罕台諤格德依及巴拉兵來會遂定  
西域諸城置達魯噶齊監治之冬十月金主珣殂子守  
緒立是歲宋復遣苟夢玉來

十九年甲申夏宋大名總管彭義斌侵河北史天倪與戰于恩州敗之是歲帝至東印度國角端見班師

二十年乙酉春正月還行宮二月武仙以真定叛殺史天倪董俊判官李全亦以中山叛三月史天澤擊仙走之復真定夏六月彭義斌以兵應仙天澤禦於贊皇擒斬之

二十一年丙戌春正月以西夏納仇人實勒噶克繖昆及不遣質子詔親征二月取黑水等城夏避暑瑋楚山

取甘肅等州秋取西涼府綽羅和拉等縣遂踰沙陀至  
黃河九渡取雅爾等縣九月李全執張琳郡王岱遜進  
兵圍全於益都冬十一月庚申帝攻靈州夏遣威明令  
公來援丙寅帝渡河擊夏師敗之丁丑五星聚見于西  
南駐蹕鹽州川十二月李全降授張柔行軍千戶保州  
等處都元帥是歲皇子諤格德依及察罕之師圍金南  
京遣唐慶責歲幣于金

二十二年丁亥春帝留兵攻夏王城自率師渡河攻積

石州二月破臨洮府三月破洮河西寧二州遣旺沁諾

延攻信都府拔之夏四月帝次龍德拔德順等州德順

節度使愛新進士馬肩龍死焉五月遣唐慶等使金閏

月避暑六盤山六月金遣完顏哈昭鄂屯阿古來請和

帝謂羣臣曰朕自去冬五星聚時已嘗許不殺掠遽忘

下詔耶今可布告中外令彼行人亦知朕意是月夏主

李覲降帝次清水縣西江秋七月壬午不豫己丑崩于

薩里川哈刺圖之行宮臨崩謂左右曰金精兵在潼關



南據連山北限大河難以遽破若假道于宋宋金世讐  
必能許我則下兵唐鄧直搗大梁金急必徵兵潼關然  
以數萬之衆千里赴援人馬疲弊雖至弗能戰破之必  
矣言訖而崩壽六十六葬起輦谷至元三年冬十月追  
謚聖武皇帝至大二年冬十一月庚辰加謚法天啓運  
聖武皇帝廟號太祖在位二十二年帝深沉有大略用  
兵如神故能滅國四十遂平西夏其奇勲偉跡甚衆惜  
乎當時史官不備或多失於記載云

戊子年是歲皇子圖類監國

元史卷一

元史卷一考證

阿倫果幹寡居 阿倫果幹原文作阿蘭果火史蒙上  
文刪省但稱阿蘭於音譯未合今以全名改對下做  
此

托端呼爾察曰 原文作脫端曰按上文作脫端火兒  
真未可但稱脫端今以全名譯對

若哲伯 原文作哲別卷後又作遮別他卷又作只必  
者別闍別皆以音近而訛今併改哲伯

額布根 原文作也不干各卷又訛作也不堅阿卜干  
今併改

宴于鄂諾河上 原文作幹難河他卷又作阿難又訛  
作兀難今併改

遂會于圖喇河上 原文作土兀刺河他卷又訛作禿  
忽刺今併改

會奈曼部長博囉汗 原文作不魯欲罕卷後又作盃  
魯可汗今併改

博囉罕 原文作博爾忽他卷又作博爾渾今併改

已而與皇弟哈扎爾再伐奈曼 弟原文作帝考世系

表哈扎爾為太祖昆弟行帝弟音近且當時國俗有

大皇帝二皇帝之稱修史者遂沿其妄卷後鄂齊錦

為烈祖第四子亦稱皇帝可證然於名義不合今並

改正

薩勒珠特 原文作散只兀他卷又作散只兒今併改

伊奇喇斯 原文作亦乞刺思他卷又作亦其列思亦

啓烈思今併改

長子卓沁 原文作木赤考之世系表及紀傳所載作  
木赤亦作拙赤木木形似木拙音同今併改

歲癸亥 原文作癸丑考是年為金章宗泰和三年越  
二年而太祖稱帝是為丙寅况以前壬戌後乙丑計  
之亦不當有癸丑今據改

為果囉囉部所敗 原文作火魯刺部即卷前火魯刺  
思部係脫字今依前譯改

皇弟鄂齊錦 原文作皇帝幹赤斤幹赤斤他卷又訛  
作幹真今併改帝改弟說見前

元年迪延汗子庫楚類汗 原文作屈出律罕他卷又  
作曲書律罕屈曲音近書出字以草體相似而訛今  
併改

二年使奇爾濟蘇 原文作乞力吉思他卷又作乞里  
吉思曲列吉思今併改

十年金元帥烏庫哩音達琿以城降 原文作寅荅虎

金史四庫全書  
烏古論烏古論改烏庫哩考烏庫哩為金之著姓若  
是兩人不當一稱名而一舉姓此事金宣宗本紀未  
載蘄天爵名臣事略載穆呼哩攻北京金守將銀青  
嬰城自守其將高德玉等殺銀青推烏庫哩音達瑛  
為帥未幾以城降核之續通鑑亦同為太祖九年事  
年月雖不符而姓名則合且以下文以音達瑛為留  
守文義考之其為名氏顛倒無疑今據改

金宣撫布希萬努據遼東 按塔斯傳云從定宗於潛



邱東征擒金咸平宣撫完顏萬努於遼東萬努自乙亥歲率衆保東海至是平之乙亥為太祖十年與本紀合考布希原文作蒲鮮為金之庶姓完顏為金之國姓無一人兩姓之理紀傳必有一誤或當時賜姓則未可知但萬努於金史無專傳無憑訂正姑從闕疑

十六年帝攻布哈爾 原文作卜合兒他卷又作孛合里又作不花剌今併改

二十一年丙戌 按史例編年皆紀以干支此獨失繫  
今增載後倣此

欽定四庫全書蒼要卷六千三百八十一史部

元史卷二

明翰林學士亞中大夫知制誥兼修國史宋濂等修

本紀第二

太宗

太宗英文皇帝諱諤格德依太祖第三子母曰光獻皇后鴻吉哩氏太祖伐金定西域帝攻城略地之功居多太祖崩自和博果之地來會喪

元年己丑夏至固爾班蘇巴克之地皇弟圖類來見秋  
八月己未諸王百官大會於吉魯爾河齊達勒敖拉地  
以太祖遺詔即皇帝位于奎騰阿喇勒始立朝儀皇族  
尊屬皆拜頒大扎薩克

華言大法令也

金遣阿固岱來歸太祖

之賄帝曰汝主久不降使先帝老于兵間吾豈能忘也  
賄何為哉却之遂議伐金敕蒙古民有馬百者輸牝馬  
一牛百者輸牯牛一羊百者輸粉羊一為永制始置倉  
廩立驛傳命河北漢民以戶計出賦調耶律楚材主之

西域人以丁計出賦調瑪哈穆第哈喇斯密主之印度國主穆壘國主來朝西域伊斯巴爾城酋長來降是歲金復遣使來聘不受

二年庚寅春正月詔自今以前事勿問定諸路課稅酒課驗實息十取一雜稅三十取一是春帝與圖類獵于諤爾根河遂遣兵圍京兆金主率師來援敗之尋拔其城夏避暑塔密爾河多果朗及金兵戰敗績命蘇布特援之秋七月帝自將南伐皇弟圖類皇姪莽賚扣率師

從拔天成等堡遂渡河攻鳳翔冬十一月始置十路徵收課稅使以陳時可趙昉使燕京劉中劉桓使宣德周立和王貞使西京呂振使太原楊簡高廷英使平陽王晉賈從使真定張瑜王銳使東平王德亨侯顯使北京瓜爾佳永程泰使平州田木西李天翼使濟南是月攻潼關藍關不克十二月拔天勝寨及韓城蒲城三年辛卯春二月克鳳翔攻洛陽河中諸城下之夏五月避暑于九十九泉命圖類出師寶鷄遣卓布干使宋

假道宋殺之復遣李國昌使宋需糧秋八月幸雲中始立中書省改侍從官名以耶律楚材為中書令鈕祜祿珠順為左丞相鎮海為右丞相是月以高麗殺使者命薩里台往討之取四十餘城高麗王暉遣其弟懷安公請降薩里台承制設官分鎮其地乃還冬十月乙酉帝圍河中十二月己未拔之

四年壬辰春正月戊子帝由白坡渡河庚寅圖類渡漢江遣使來報即詔諸軍進發甲午次鄭州金防城提控

馬伯竒降授伯竒金符使守之丙申大雪丁酉又雪次

新鄭是日圖類及金師戰于鈞州之三峯大敗之獲金

將布哈戊戌帝至三峯壬寅攻鈞州克之獲金將哈達

遂下商號嵩汝陝洛許鄭陳亳潁壽睢永等州三月命

蘇布特等圍南京金主遣弟曹王額爾克入質帝還留

蘇布特守河南夏四月出居庸避暑官山高麗叛殺所

置官吏徙居江華島秋七月遣唐慶使金諭降金殺之

八月薩里台復征高麗中天卒金叅政完顔色埒恒山



公武仙救南京諸軍與戰敗之九月圖類薨帝還龍庭  
冬十一月獵于納琳齊拉衮之野十二月如太祖行宮  
五年癸巳春正月庚申金主奔歸德戊辰金西面元帥  
崔立殺留守完顏納新完顏薩尼雅布以南京降二月  
幸托里圖地詔諸王議伐萬努遂命皇子庫裕克及諸  
王阿齊台將左翼軍討之夏四月蘇布特進至青城崔  
立以金太后王氏后圖克坦氏梁王從恪荆王守純等  
至軍中蘇布特遣送行在遂入南京六月金主奔蔡塔

齊爾率師圍之詔以孔子五十一世孫元措襲封衍聖公秋八月獵于額伯蘇地以阿克棟阿等充宣差勘事官括中州戶得七十三萬餘九月擒萬努冬十一月宋遣荆鄂都統孟珙以兵糧來助十二月諸軍與宋兵合攻蔡敗武仙于息州金人以海沂萊濰等州降是冬帝至阿魯烏格衮行宮大風霾七晝夜敕修孔子廟及渾天儀

六年甲午春正月金主傳位于宗室子承麟遂自經而

焚城拔獲承麟殺之宋兵取金主餘骨以歸金亡是春  
會諸王宴射于鄂爾根河夏五月帝在達蘭達巴之地  
大會諸王百僚諭條令曰凡當會不赴而私宴者斬諸  
出入宮禁各有從者男女止以十人為朋出入毋得相  
雜軍中凡十人置甲長聽其指揮專擅者論罪其甲長  
以事來宮中即置權攝一人甲外一人二人不得擅自  
往來違者罪之諸公事非當言而言者拳其耳再犯笞  
三犯杖四犯論死諸千戶越萬戶前行者隨以木鏃射

之百戶甲長諸軍有犯其罪同不遵此法者斥罷今後  
來會諸軍甲內數不足於近翼抽補足之諸人或居室  
或在軍毋敢喧呼凡來會用善馬五十足為一羈守者  
五人飼羸馬三人守克呼蘇魯克三人但盜馬一二者  
即論死諸人馬不應絆於克呼蘇魯克內者輒沒與畜  
虎豹人諸婦人製濟遜燕服不如法者及妬者乘以驛  
牛徇部中論罪即聚財為更娶秋七月以呼圖克諾延  
為中州斷事官遣達海甘布征蜀帝在巴爾斯達蘭達

巴之地議自將伐宋國王扎拉呼請行遂遣之冬獵于  
托卜輝罕地

七年乙未春城和琳作萬安宮遣諸王巴圖皇子庫裕克  
皇姪莽賚扣征西域皇子奎騰征秦鞏皇子庫春及呼  
圖克伐宋唐古征高麗秋九月諸王琨布哈獲宋何太  
尉冬十月庫春圍棗陽拔之遂徇襄鄧入郢虜人民牛  
馬數萬而還十一月奎騰攻石門金便宜都總帥汪世  
顯降中書省臣請契勘大明歷從之

八年丙申春正月諸王各治具來會宴萬安宮落成詔  
印造交鈔行之二月命應州郭勝鈞州富珠哩玖珠鄧  
州趙祥從庫春充先鋒伐宋三月復修孔子廟及司天  
臺夏六月復括中州戶口得續戶一百一十餘萬耶律  
楚材請立編修所於燕京經籍所於平陽編集經史召  
儒士梁陟充長官以王萬慶趙著副之秋七月命陳時  
可閱刑名科差課稅等案赴闕磨照詔以真定民戶奉  
太后湯沐中原諸州民戶分賜諸王貴戚鄂爾多巴圖

平陽府察罕台太原府古裕大名府博囉台邢州古魯  
格河間府布爾古特廣寧府伊克益都濟南二府戶內  
撥賜阿齊台濱棣州旺沁諾延平灤州皇子奎騰駙馬  
徹庫公主阿勒哈公主果戩國王扎拉呼察罕台丹津  
蒙古罕扎昂吉諾延青諾延和斯濟蘇竝於東平府戶  
內撥賜有差耶律楚材言非便遂命各位止設達魯噶  
齊朝廷置官吏收其租頒之非奉詔不得徵兵賦奎騰  
率汪世顯等入蜀取宋關外數州斬蜀將曹友聞冬十

月奎騰入成都詔招諭秦鞏等二十餘州皆降皇子庫  
春薨張柔等攻郢州拔之襄陽府來附以游顯領襄陽  
樊城事

九年丁酉春獵齊齊克察罕澤莽賚扣征欽察破之擒  
其酋巴齊瑪克夏四月築縹琳城作格根察罕殿六月  
左翼諸部訛言括民女帝怒因括以賜麾下秋八月命  
摩和納劉中試諸路儒士中選者除本貫議事官得四  
千三十人冬十月獵于野馬川幸龍庭遂至行宮是冬



琨布哈帥師圍光州命張柔鞏彥暉史天澤攻下之遂別攻蘄州降隨州略地至黃州宋懼請和乃還

十年戊戌春塔斯軍至北峽關宋將汪統制降夏襄陽別將劉義叛執游顯等降宋宋兵復取襄樊帝獵于齊齊克察罕澤築托斯和城作迎駕殿秋八月陳時可高慶民等言諸路旱蝗詔免今年田租仍停舊未輸納者俟豐歲議之

十一年己亥春復獵于齊齊克察罕澤皇子奎騰軍至

自西川秋七月游顯自宋逃歸以山東諸路災免其稅糧冬十一月莽賚扣率師圍烏蘇木奇城閱三月拔之十二月商人溫都爾哈瑪爾買撲中原銀課二萬二千錠以四萬四千錠為額從之

十二年庚子春正月以溫都爾哈瑪爾充提領諸路課稅所官皇子庫裕克克西域未下諸部命張柔等八萬戶往伐宋冬十二月詔庫裕克班師敕州郡失盜不獲者以官物償之國初令民代償民多亡命至是罷之是

歲以官民貸回鵲金償官者歲加倍名羊羔息其害為甚詔以官物代還凡七萬六千錠仍命凡假貸歲久惟子本相侔而止者為令籍諸王大臣所俘男女為民

十三年辛丑春二月獵于齊齊兄察罕澤帝有疾詔赦天下囚徒帝瘳秋高麗國王王暉以族子縉入質冬十月命伊羅斡齊主管漢民公事十一月丁亥大獵庚寅還至諤特古呼蘭山溫都爾哈瑪爾進酒帝歡飲極夜乃罷辛卯遲明崩于行殿在位十三年壽五十有六葬

起輦谷追謚英文皇帝廟號太宗帝有寬弘之量忠恕之心量時度力舉無過事華夏富庶羊馬成羣旅不齎糧時稱治平

壬寅年春六皇后尼瑪察氏始稱制秋七月張柔自五河口渡淮攻宋揚滁和等州

癸卯年春正月張柔分兵屯田于襄城夏五月熒惑犯房星秋后命張柔總兵戍杞

甲辰年夏五月中書令耶律楚材薨

乙巳年秋后命馬步軍都元帥察罕等率騎三萬與張  
柔掠淮西攻壽州拔之遂攻泗州盱眙及揚州宋制置  
趙葵請和乃還

### 定宗

定宗簡平皇帝諱庫裕克太宗長子母六皇后尼瑪察  
氏以丙寅年生帝太宗嘗命諸王阿齊台伐金帝以皇  
子從虜其親王而歸又從諸王巴圖西征次阿克蘇境  
攻圍木柵山寨以三十餘人與戰帝及憲宗與焉太宗

嘗有旨以皇孫寶勒們為嗣太宗崩皇后臨朝會諸王百官於達蘭達巴之地遂議立帝

元年丙午春正月張柔入覲於和琳秋七月即皇帝位於昂吉蘇默托里之地帝雖御極而朝政猶出於六皇后云冬獵黃羊于野馬川權萬戶史權等耀兵淮南攻虎頭關寨拔之進圍黃州

二年丁未春張柔攻泗州夏避暑奇爾圭哈爾吉斯之地秋西巡八月命伊勒吉濟達率綽斯滿部兵征西是

月詔蒙古人戶每百以一名充巴圖爾九月取太宗宿衛之半以伊克們都爾領之冬十月括人戶

三年戊申春三月帝崩于杭錫雅爾之地在位三年壽四十有三葬起輦谷追謚簡平皇帝廟號定宗是歲大旱河水盡涸野草自焚牛馬十死八九人不聊生諸王及各部又遣使於燕京迤南諸郡徵求貨財弓矢鞍轡之物或於西域回鶻索取珠璣或於海東索取鷹鷂駙騎絡繹晝夜不絕民力益困然自壬寅以來法度不一

內外離心而太宗之政衰矣

己酉年

庚戌年定宗崩後議所立未決當是時己三歲無君其  
行事之詳簡策失書無從考也

元史卷二



元史卷二考證

二年命蘇布特援之 原文作速不台他卷又作唆布

台又作速卜帶今併改

五年諸王阿齊台 原文作按赤帶他卷又作安赤台

又作按只斛按只帶今併改

梁王從恪荆王守純 原文作荆王從恪梁王守純考

金史列傳從恪衛紹王子崔立為亂太后立為梁王

守純宣宗子正大元年進封荆王史文顛倒今據改

孔子五十一世孫元措 原文作元楷參考續通鑑綱目及耶律楚材傳並據孔氏家譜改

七年皇子庫春及呼圖克伐宋 庫春原文作曲出他

卷又作闊出又作闊赤又訛作幹赤呼圖克原文作忽都忽他卷又作忽都虎忽都禿又但作忽都今併改

九年獵于齊齊克察罕之地 原文作揭揭察哈他卷又作怯蹇义罕今併改

定宗三年或於海東取鷹鵠 原文取鷹鵠上行樓字  
地志並無海東樓之名考續通鑑綱目有海東取鷹  
鵠之文據刪



欽定四庫全書蒼要卷六千三百八十二史部

元史卷三

明翰林學士亞中大夫知制誥兼修國史宋濂等修

本紀第三

憲宗

憲宗桓肅皇帝諱莽賚扣睿宗圖類長子也母曰莊獻  
太后竒味氏諱縑勒噶塔納歲戊辰十二月三日生帝  
時鴻和岱部知天象者言帝後必大貴故以莽賚扣為

名莽賚扣華  
言長子也

太宗在潛邸養以為子屬昂輝皇后撫育

之既長為娶果囉羅部女呼爾察為妃分之部民及睿  
宗薨乃命歸藩邸從征伐屢立奇功嘗攻欽察部其酋  
巴齊瑪克逃于海島帝聞亟進師至其地適大風刮海  
水去其淺可渡帝喜曰此天開道與我也遂進屠其衆  
擒巴齊瑪克命之跪巴齊瑪克曰我為一國主豈苟求  
生且身非駝何以跪人為乃囚之巴齊瑪克謂守者曰  
我竄入于海與魚何異然終見擒天也今水且迴軍宜

早還帝聞之即班師而水已至後軍有浮渡者復與諸王巴圖征俄羅斯部至額里齊城躬自搏戰破之歲戊申定宗崩朝廷久未立君中外恟恟咸屬意於帝而覲覲者衆議未決諸王巴圖穆格額呼布格綏克托台竒爾大將烏蘭哈達薩納台特們德爾伊蘇布哈咸會于阿爾圖和賚之地巴圖首建議推戴時定宗皇后烏拉海額實所遣使者巴拉在坐曰昔太宗命以皇孫寶勒們為嗣諸王百官皆與聞之今寶勒們故在而議欲他

屬將寘之何地耶穆格曰太宗有命誰敢違之然前議  
立定宗由皇后托里格呼勒與汝輩為之是則違太宗  
之命者汝等也尚誰咎耶巴拉語塞烏蘭哈達曰莽賚  
扣聰明睿知人咸知之巴圖議良是巴圖即申令於衆  
衆悉應之議遂定

元年辛亥夏六月西方諸王伯爾克托海特穆爾東方  
諸王伊克托歡伊遜克阿齊台塔齊爾伯勒格台西方  
諸大將巴哩齊等東方諸大將伊蘇布哈等復大會于



奎騰敖拉之地共推帝即皇帝位於鄂諾河實勒們及諸弟諾果等心不能平有後言帝遣諸王實喇與孟克薩勒帥兵覘之諸王伊蘇蒙克布林哈札爾等後期不至遣布林濟達率兵備之遂改更庶政命皇弟呼必賚領治蒙古漢地民戶遣塔爾鄂勒博察球爾賽音諤德齊趙壁等詣燕京撫諭軍民以孟克薩勒為斷事官以博勒和掌宣發號令朔覲貢獻及內外聞奏諸事以鴻和爾留守和琳宮闕帑藏阿勒達爾副之以伊囉幹齊

布扎爾鄂勒博都特達拉等充燕京等處行尚書省事

賽音諤德齊鼐智密鼎佐之以諾海塔喇海巴蘇呼等

充巴實伯里等處行尚書省事溫都爾烏遜阿哈瑪特

伊德實佐之以諤爾根充阿穆和等處行尚書省事帕

哈哩鼎鼐智密鼎佐之以察罕伊爾根統兩淮等處蒙

古漢軍以丹達爾統四川等處蒙古漢軍以和爾台統

土蕃等處蒙古漢軍皆仍前征進以僧海雲掌釋教事

以道士李真常掌道教事約蘇圖阿齊台昌吉卓諾哈

達竒凌阿勒楚爾及網阿塔阿薩爾和塔拉等坐誘諸王為亂竝伏誅頒便益事宜於國中凡朝廷及諸王濫發牌印詔旨宣命盡收之諸王馳驛許乘二馬遠行亦不過四諸王不得擅招民戶諸官屬不得以朝覲為名賦歛民財民糧遠輸者許於近倉輸之罷築和琳城役千五百人冬以揚珠濟達違命遣哈坦誅之仍籍其家二年壬子春正月辛實桂地遣竒塔特布哈攻莽賚伊勒都齊寨皇太后崩夏駐蹕和琳分遷諸王於各所格

丹於巴實伯里地默呼於雅爾達實河海都於哈里雅爾地伯爾克於庫爾哲地托克托於額密呼地孟格圖及太宗皇后克勒奇庫塔納於奎騰所居地之西仍以太宗后妃家貲分賜親王定宗后及實勒們母以厭禳事覺竝賜死謫實勒們伊蘇布琳等於摩多齊之地禁錮呼齊納和斯圖等於軍營秋七月命呼必賚征大理諸王托羅該薩奇勒征身毒奇塔特布哈征瑪拉希實喇征西域蘇勒坦諸國詔諭宋荆南襄陽樊城均州諸

守將使來附八月呼必賚次臨洮命總帥汪特格以城  
利州聞欲為取蜀計冬十月命諸王伊克征高麗駐蹕  
諤特古呼蘭地時因獵墮馬傷臂不視朝百餘日十二  
月戊午大赦以特爾格齊庫庫楚等掌帑藏布琳哈喇  
烏遜掌鄂拓克阿固察掌祭祀醫巫卜筮阿拉克布哈  
副之諸王哈喇薨以珠爾噶岱掌傳驛所需博勒和掌  
筆且齊寫發宣詔及諸色目官職徙諸匠五百戶修行  
宮是歲籍漢地民戶諸王實喇薨

三年癸丑春正月汪特格修治利州且屯田蜀人莫敢  
侵軼帝獵于齊齊克察罕地諸王伊克以怨襲諸王塔  
拉爾營帝遂會諸王于鄂諾河北賜予甚厚罷伊克征  
高麗兵以扎拉台為征東元帥遣必齊克伯爾克括俄  
羅斯戶口三月大兵攻海州戍將王國昌逆戰于城下  
敗之獲都統一人夏六月命諸王錫里庫及烏蘭哈達  
等帥師征西域法勒哈巴哈台等國又命多托爾台薩  
里圖爾哈等征痕部斯坦克實密爾等國辛和哩呼納

顏布哈地諸王巴圖遣托卜齊雅詣行在乞買珠銀萬錠以千錠授之仍詔諭之曰太祖太宗之財若此費用何以給諸王之賜王宜詳審之此銀就充今後歲賜之數秋幸準諾爾以孟克薩勒為萬戶哈坦為扎爾古齊九月呼必賚次塔拉地分兵三道以進冬十二月大理平駐蹕昂吉地命宗王雅勒呼與洪福源同領軍征高麗攻拔禾山東州春州三角山楊根天龍等城是歲斷事官孟克薩勒卒

四年甲寅春帝獵于齊齊克察罕夏幸伊爾默克之地  
遣扎拉爾部人和爾齊征高麗秋七月詔官吏之赴朝  
理算錢糧者許自首不公仍令以後浮費冬大獵于額  
默克沁哈爾察該地呼必賚還自大理留烏蘭哈達攻  
諸夷之未附者入覲於獵所是歲會諸王于庫庫諾爾  
之西乃祭天于日月山初籍新軍帝謂大臣求可以慎  
固封守閑於將畧者擢史樞征行萬戶配以真定相衛  
懷孟諸軍駐唐鄧張柔移鎮亳州權萬戶史權七鄧州



張柔遣張信將八漢軍戍潁州王安國將四千戶渡漢南深入而還張柔以連歲勤兵兩淮艱於糧運奏據亳之利詔柔率山前八軍城而戍之柔又以渦水北隘淺不可舟軍既病涉曹濮魏博粟皆不至乃築甬路自亳抵汴堤百二十里流深而不能築復為橋十五或廣八十尺橫以二堡戍之均州總管孫嗣遣人齎蠟書降且乞援史權以精甲備宋人之要遂援嗣而來其後驍將鍾顯王梅杜柔袁師信各帥所部來降

五年乙卯春詔徵逋欠錢穀夏帝幸伊爾默克圖秋九月張柔會大帥于符離以百丈口為宋往來之道可容萬艘遂築甬路自亳而南六十餘里中為橫江堡又以路東六十里皆水可致宋舟乃立柵水中惟密置偵邏於所達之路由是鹿邑寧陵考柘楚丘南頓無宋患陳蔡頽息皆通矣是歲改命扎拉台與洪福源同征高麗後此又連三歲攻拔其光州安城中州立鳳珍原甲向玉果等城

六年丙辰春大風起北方砂礫飛揚白日晦冥帝會諸王百官于諤爾伯勒格圖地設宴六十餘日賜金帛有差仍定擬諸王歲賜錢穀呼必賚遣默爾合齊詣行在所奏請續簽內郡漢軍從之夏四月駐蹕于塔密爾五月辛酉喇鄂爾多六月太白晝見辛岱爾哈達地諸王伊遜克駙馬約索爾等請伐宋帝亦以宋人違命囚使會議伐之秋七月命諸王各還所部以居諸王塔齊爾駙馬特爾格軍過東平諸處掠民羊豕帝聞遣使問罪

由是諸軍無犯者是歲高麗國王細嗟甫雲南酋長摩  
合羅嗟及蘇勒坦諸國來覲烏蘭哈達討白蠻等克之  
遂自寶巴爾還至重慶府敗宋將張都統賜金縷織文  
衣一襲銀五十兩綵帛萬二百匹以賚軍士冬駐蹕阿  
多固塔齊兒愛滿以阿穆河回回降民分賜諸王百官  
七年丁巳春幸呼蘭伊勒吉詔諸王出師征宋竒塔特  
布哈等討平莽賚伊勒都齊寨夏六月謁太祖行宮祭  
旗鼓復會于吉魯爾之地還幸伊爾默克圖秋駐蹕準

諾爾醜馬乳祭天九月出師南征以駙馬琳沁之子奇塔特為達魯噶齊鎮守俄羅斯仍賜馬三百羊五千回鶻獻水精盆珍珠傘等物可直銀三萬餘錠帝曰方今百姓疲弊所急者錢爾朕獨有此何為却之賽音諤德齊以為言帝稍償其直且禁勿復有獻宗王塔奇爾率諸軍南征圍樊城霖雨連月乃班師元帥布琳濟達軍自鄧州略地遂渡漢江冬十一月烏蘭哈達伐交趾敗之入其國安南主陳日昷竄海島遂班師遣阿蘭達爾

托音囊嘉特等詣陝西等處理算錢穀大駕度漠南至  
於玉隴棧呼必賚及諸王額埒布格巴爾圖楚木哈喇  
裕隆哈寶錫里濟公主塔瑪噶等來迎大燕既而各遣  
歸所部

八年戊午春正月朔幸阿爾班托輝之地受朝賀二月  
陳日昃傳國于長子光曷光曷遣壻與其國人以方物  
來見烏蘭哈達送詣行在所諸王錫里庫討回回法勒  
哈平之禽其王遣使來獻捷帝獵于伊埒哈雅之地師

南征次于河適水合以土覆之而渡帝自將伐宋由西  
蜀以入命張柔從呼必賚征鄆趨杭州命塔察攻荆山  
分宋兵力宋四川制置使蒲澤之攻成都耨埒率師與  
戰敗之進攻雲頂山守將姚某等以衆相繼來降詔以  
耨埒為都元帥帝由東勝河渡遣叅知政事劉太平括  
興元戶口三月命洪察球爾率師從扎拉台征高麗夏  
四月駐蹕六盤山諸郡縣守令來覲豐州千戶郭燧奏  
請續簽軍千人修治金州從之時軍四萬號十萬分三

道而進帝由隴州入散關諸王默格由祥州入米倉關  
布爾察克萬戶由漁關入沔州以明安岱爾為太傅守  
京兆詔徵益都行省李璫兵璫來言益都南北要衝兵  
不可撤從之璫還擊海州漣水等處五月皇子阿寶達  
因獵獨騎傷民稼帝見讓之遂撻近侍數人士卒有拔  
民葱者即斬以徇由是秋毫莫敢犯仍賜所經郡守各  
有差秋七月留輜重於六盤山率兵由寶鷄攻重貴山  
所至輒平八月辛丑璫與宋人戰殺宋師殆盡九月駐



蹕漢中都元帥耨埒留密喇卜和卓劉哈瑪爾等守成  
都率餘兵渡馬湖禽宋制置使張實遣實招諭苦竹隘  
實遁冬十月壬午帝次寶峯癸未如利州觀其城池竝  
非深固以汪特格能守蜀不敢犯賜卮酒獎諭之帝渡  
嘉陵江至白水江命特格造浮梁以濟梁成賜特格等  
金帛有差帝駐蹕劔門戊子攻苦竹隘裨將趙仲竊獻  
東南門師入與其守將楊立戰敗之殺立衆皆奔潰詔  
毋犯趙仲家屬仍賜仲衣帽徙于隆慶己亥獲張實支

解之賜特格玉帶及犒賞士卒留精兵五百守之遣使  
招諭龍州帝至高峯庚子圍長寧山守將王佐裨將徐  
昕等率兵出戰敗之十一月己酉帝督軍先攻鵝頂堡  
壬子力戰于望喜門薄暮宋知縣王仲由鵝頂堡出降  
是夜破其城王佐死焉癸丑誅佐之子及徐昕等四十  
餘人以彭天祥為達嚕噶齊治其事王仲副之丙辰攻  
大獲山守將楊大淵降命大淵為四川侍郎仍以其兵  
從庚午次和溪口遣驍騎略青居山是月龍州王知府

降諸王孟格圖攻禮義山不克諸王塔齊爾略地至江  
而還竝會于行在所命呼必賚統諸路蒙古漢軍伐宋  
十二月壬午楊大淵率所部兵與汪特格分擊相等  
縣都元帥耨埒攻簡州以宋降將張威率衆為先鋒乙  
酉帝次于運山大淵遣人招降其守將張大悅仍以大  
悅為元帥師至青居山裨將劉淵等殺都統段元鑿降  
庚寅遣使招諭未附丁酉隆州守縣降己亥大良山守  
將蒲元圭降詔諸軍毋得掠癸卯攻雅州拔之石泉守

將趙順降甲辰遣宋人晉國寶招諭合州守將王堅堅  
辭之國寶遂歸是歲皇子瑄都薨于吉河之南

九年己未春正月乙巳朔駐蹕重貴山北置酒大會因  
問諸王駙馬百官曰今在宋境夏暑且至汝等其謂可  
居否乎扎拉爾部人托歡進曰南土瘴癘上宜北還所  
獲人民委吏治之便阿爾拉部人巴哩齊曰托歡怯臣  
願往居焉帝善之戊申晉國寶歸次峽口王堅追還殺  
之諸王孟格圖復攻渠州禮義山伊爾圖魯雄攻巴州

平梁山丁卯大淵請攻合州俘男女八萬餘二月丙子  
帝悉率諸兵渡鷄爪灘至石子山丁丑督諸軍戰城下  
辛巳攻一字城癸未攻鎮西門三月攻東新門奇勝門  
鎮西門小堡夏四月丙子大雷雨凡二十日乙未攻護  
國門丁酉夜登外城殺宋兵甚衆五月屢攻不克六月  
丁巳汪持格復選兵夜登外城馬軍寨殺寨主及守城  
者王堅率兵來戰遲明遇雨梯折後軍不克進而止是  
月帝不豫秋七月辛亥留精兵三千守之餘悉攻重慶

癸亥帝崩于釣魚山壽五十有二在位九年追謚桓肅  
皇帝廟號憲宗帝剛明雄毅沈斷而寡言不樂燕飲不  
好侈靡雖后妃不許之過制初太宗朝羣臣擅權政出  
多門至是凡有詔旨帝必親起草更易數四然後行之  
御羣臣甚嚴嘗諭旨曰爾輩若得朕獎諭之言即志氣  
驕逸志氣驕逸而災禍有不隨至者乎爾輩其戒之性  
喜畋獵自謂遵祖宗之法不蹈襲他國所為然酷信巫  
覡卜筮之術凡行事必謹叩之殆無虛日終不自厭也



元史卷三



元史考證卷三

征俄羅斯部 原文作斡羅思部他卷又作阿羅思兀

魯思今併改

至額里齊城 原文作也烈贊城他卷又作也里替今

併改

定宗皇后烏拉海額實 按后妃表傳本名斡兀立海

迷失此刪省斡兀立但稱海迷失於音譯未合今以

全名改對

由皇后托里格呼勒 原文作脫忽列乃考后妃表傳  
又作脫列哥那今併改

元年遣布琳濟達率兵備之 原文作不憐吉斛他卷  
又作卜鄰吉斛今併改

二年以珠爾噶岱掌傳驛所需 原文作只兒幹帶他  
卷又作只里瓦斛只里幹台今併改

三年以扎拉台為征東元帥 原文作扎刺兒帶卷後  
又作劄刺斛今併改

征痕都斯坦 原文作欣都思他卷又作遜都思又但  
作忻都今併改

七年囊嘉特等 原文作囊加台他卷又作南家帶今  
併改

冬帝度漠南 按上文既書冬十一月此複書冬字當  
是十二月之訛但考續綱目宋元通鑑俱不載此事  
無憑訂正仍闕疑

八年進攻大獲山 原文作長獲山據續綱目及宋元

通鑑改

守將楊大淵降

原文祇稱大淵此係初見史例當具

姓名今增

隆州守縣降

守縣當是守將之訛但他書無可訂正

仍闕疑

六月丁巳

以上文正月乙巳朔推之六月內不當有

丁巳今闕疑